



Broj, 01-07-10-25-15/2025
Sarajevo, 30.1.2025. godine

Na osnovu člana 25. stav (1) i 26. stav (4) Zakona o slobodi pristupa informacijama na nivou institucija Bosne i Hercegovine ("Službeni glasnik BiH", br. 61/23) kao i člana 5. Pravilnika o postupanju po zahtjevu za pristup informacijama Visokog sudskog i tužilačkog vijeća Bosne i Hercegovine br. 08-02-3075/2010 od 2.9.2010. godine, 08-02-3645/2013 od 24.9.2013. godine, 08-02-388-1/2014 od 22.1.2014. godine i 08-07-2-3459/2021 od 29.9.2021. godine, rješavajući po zahtjevu za pristup informacijama Selme Peco, [REDACTED], od 24.1.2025. godine, predsjednik Visokog sudskog i tužilačkog vijeća Bosne i Hercegovine donosi

RJEŠENJE

Odobrava se zahtjev za pristup informacijama ustupanjem dijela tonskog zapisa sa sjednice Vijeća, održane 16.1.2025. godine, u vezi raspravljanja i odlučivanja o imenovanju na pozicije sudija u Poseban odjel Vrhovnog suda Federacije Bosne i Hercegovine za korupciju, organizovani kriminal i međukantonalni kriminal, kao i raspravljanja i odlučivanja o imenovanju tužilaca u Federalno tužilaštvo Federacije Bosne i Hercegovine.

Obrazloženje

Visoko sudsko i tužilačko vijeće Bosne i Hercegovine (u daljem tekstu: VSTV BiH/Vijeće) je 24.1.2025. godine zaprimilo zahtjev Selme Peco, [REDACTED] (u daljem tekstu: podnositeljica zahtjeva), za pristup informacijama kojim je tražena kopija tonskog zapisa sa sjednice VSTV-a BiH održane dana 16.1.2025. godine u dijelu koji se odnosi na imenovanje sudija u Poseban odjel Vrhovnog suda Federacije BiH i imenovanje tužilaca u Federalno tužilaštvo Federacije BiH. Informacije su tražene u svrhu pokretanja upravnog spora u skladu sa odredbama Zakona o VSTV-u BiH, u svojstvu kandidatkinje predložene za imenovanje u konkursnoj proceduri za upražnjena mjesta za poziciju tužioca Federalnog tužilaštva FBiH kao i učesnice u konkursnoj proceduri za sudije Posebnog odjela Vrhovnog suda FBiH.

Razmatrajući predmetni zahtjev, u skladu s nadležnostima VSTV-a BiH, utvrđeno je da VSTV BiH posjeduje podatke navedene u izreci ovog rješenja, te da omogućavanje pristupa istim nije protivno odredbama Zakona o slobodi pristupa informacijama na nivou institucija Bosne i Hercegovine.

Uvidom u službenu dokumentaciju, utvrđeno je da se sjednice Vijeća, u skladu sa članom 32. Poslovnika VSTV-a BiH („Službeni glasnik BiH”, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24) snimaju, a da se tonksi zapisi čuvaju u Sekretarijatu VSTV-a BiH i nisu dostupni javnosti, odnosno *Vijeće može donijeti odluku da zainteresovanim licima, na njihov zahtjev, ustupi dio tonskog zapisa za koji postoji izražen interes javnosti,*

S tim u vezi, predsjednik Vijeća donio je dana 28.1.2025. godine odluku br. 08-07-2-407-1/2025, o provođenju elektronskog/telefonskog glasanja u vezi sa dva zahtjeva za pristup tonskom zapisu sa sjednice, od kojih je jedan zahtjev na osnovu kojeg se donosi ovo rješenje, a koji se, zbog razloga svrsishodnosti i ekonomičnosti, budući da se odnosio na isti činjenični i pravni osnov razmatrao po hitnom postupku zajedno sa drugim zahtjevom u kojem rokovi za postupanje propisani ZOSPI-jem nisu omogućavali da se predmetno pitanje razmatra na redovnoj sjednici Vijeća.

Nakon provedenog glasanja Vijeće je jednoglasno dalo saglasnost na ustupanje tonskog zapisa podnositeljici zahtjeva sa sjednice Vijeća, održane 16.1.2025. godine, u dijelu raspravljanja i odlučivanja o imenovanju na pozicije sudija u Poseban odjel Vrhovnog suda Federacije Bosne i Hercegovine za korupciju, organizovani kriminal i međukantonalni kriminal, kao i tonskog zapisa koji se odnosi na raspravljanje i odlučivanje o imenovanju tužilaca u Federalno tužilaštvo Federacije Bosne i Hercegovine.


U prilogu ovog rješenja dostavlja se CD sa tonskim zapisom sa podacima iz izreke rješenja.

Postupajući po zahtjevu podnositeljice, uzimajući u obzir sve gore navedeno, odlučeno je kao u dispozitivu ovog rješenja.

Pouka o pravnom lijeku:

Protiv ovog rješenja podnositeljica zahtjeva ima pravo podnijeti žalbu Žalbenom vijeću pri Vijeću ministara Bosne i Hercegovine u roku od 15 dana od dana prijema istog.

Ukoliko Žalbeno vijeće ne odluči po žalbi u roku od 30 dana od dana prijema žalbe, podnositeljica žalbe ima pravo pokrenuti upravni spor pred Sudom Bosne i Hercegovine zbog šutnje administracije.



Dostavljeno:

1. Podnositeljici zahtjeva
2. Odjelu za pravna pitanja
3. U spis

Prilog:

1. CD sa tonskim zapisom sa sjednice Vijeća, održane 16.1.2025. godine, u dijelu raspravljanja i odlučivanja o imenovanju na pozicije sudija u Poseban odjel Vrhovnog suda Federacije Bosne i Hercegovine za korupciju, organizovani kriminal i međukantonalni kriminal, kao i tonski zapis koji se odnosi na raspravljanje i odlučivanje o imenovanju tužilaca u Federalno tužilaštvo Federacije Bosne i Hercegovine.